

松

心

詩

錄

人有性情詩於是作志發爲言聲通於樂波瀾須才根柢在學
肆必先醇苦乃得樂作者牛毛成者麟角僕非曰能寸心是託
得失自知疾病自藥後有桓譚豈能豫度番禺張維屏

先生生平所有著述從不請人作序昔翁覃谿學士

方綱

有

粵東三子詩序盛子履學博

大士

有粵東七子詩序姚石甫

廉訪

榮

有聽松廬詩鈔序龔定盦舍人

自珍

有詩人徵略序

先生皆感其意而不載其文至師友評語亦不錄入嘗曰文章千古事得失寸心知果有可知不患無知者若藉重於人言未必合我意也先生自序止三行今仍錄入并於卷首咸豐甲寅五月門人李長榮謹識

昔宋黃文節公山谷老人自選其詩數百首別梓以行明徐昌穀效之國朝王文簡公漁洋山人效之世所行精華錄是也吾師南山先生今年七十有五亦仿山谷老人之意取乾隆甲寅至咸豐甲寅六十年中之詩摘錄三百餘首名曰

松心詩錄時詰嗣小蓬大令賓禹觀察皆服官在外門人中

惟

長樂世良

居近師門時親杖履遂命兩人共司編校適同

門趙勉之見之殷然獨任剗之費茲校刊既竣並識於此
此編僅什之二三如欲觀先生全詩自有聽松廬詩鈔十六
卷及松心總集中之珠江集燕臺集白雲集羅浮集洞庭集
黃梅集松滋集廣濟集襄陽集清濠集豫章集匡廬集桂林
集花地集草堂集諸本在甲寅七月門人沈世良謹識

松心詩錄總目

番禺 張維屏 子樹

卷一 古今體詩四十七首

起乾隆甲寅 時年十五

卷二 古今體詩五十五首

卷三 古今體詩五十六首

卷四 古今體詩五十八首

卷五 古今體詩五十八首

卷六 古今體詩五十一首

卷七 古今體詩二十六首

卷八 古今體詩六十六首

卷九 古今體詩五十一首

古今體詩三十六首

至成豐甲寅 時年七十五

古今體詩共錄三百八十四首

師友詩共錄五十三首

南海門人李長榮編校

番禺門人沈世良編校

南豐門人趙惟濂校刊

松心詩錄卷一

番禺 張維屏 子樹

白雲

乾隆甲寅

白雲環北郭獨立睇遙岑
海國蛟龍氣仙山鸞鶴音
泉飛丹竈潔苔積石壇深
何必求瓜棗巖棲生道心

春夜紫藤池館讌集

東風萬物憐送暖入瓊筵
白月藤花下春人楊柳邊
寄愁歸碧海得句問瑤天
誰道蓬山遠雲屏六曲前

牡丹

富麗配東皇穠華冠衆芳
酒行三雅爵詩贈百花王
佛現瓔珞相仙畱環珮
裝天香原自貴不必問沈香

紫藤篇

有序

余年十三聘方氏女越五載將卜吉請期而女哭母病
歿其兄以女小像及手臨洛神一紙屬余藏之其所居
小閣前有紫藤一株女歿紫藤亦枯死爲詩悼之遂以
紫藤名篇

枯槎觸石銀河乾女牀樹冷驚孤鸞天孫不樂佳塵世何苦寫
韻來人間匏瓜欲墜罡風起雲軿遠送嬋娟子遙知高處不勝
寒玉樓十二秋如水素娥相對亦悽然月下魂歸粧鏡邊暗塵
漠漠紫藤化化作子規啼暮烟

登樓

西北有高樓樓前杜若洲美人如斷鴈往事問牽牛璧月隨風

去銀雲學水流明河原不遠只在柳梢頭

懷仙

修成慧業易生天藥店飛龍竟化煙溫嶠鏡臺畱隔世阿嬌金
屋貯何年落梅風颺雕欄外脩竹寒生翠袖邊不信癡慕吞魄
去幾番翹首望團圓

天女乘風訪素娥怕來禪榻伴維摩韋郎再世風情減崔護重
尋淚點多縱有胡麻難作飯空畱團扇不成歌年年寒食梨花
節一瓊椒漿奠女蘿

雙魚碧海盼迢迢獨鶴瑤臺耐寂寥灑淚雨零紅豆溼步虛風
起白榆搖聘錢天上償非易鑄鐵人間恨未銷藏得彩鸞書一
紙此生無分學文簫

木石言金卷一
二
星辰昨夜已前塵欲向修羅問夙因浪說蘭香嫁張碩不知仙
子憶劉晨望來殘月如初月坐對新人念故人日把沈檀熏小
像可能紙上降真真

春寒

銀屏珠箔護春寒畫裏樓臺霧裏看鸚鵡不言花不笑悄無人
處有闌干

秋懷

千林木落動霜鐘雲淨天高一盪胸晚徑日斜明橘柚澄江水
遠靜魚龍風煙萬里愁征客寒暑三時閔老農慙愧腐儒謀食
拙杜門羸羸養疎慵

莽莽荆襄厭甲兵忍看魑魅困蒼生風呼陰峒蠶苗出月照荒

城妖鳥鳴娘子軍容誇左道丈人師律重先聲讀書殺賊男兒
事莫讓終童獨請纓

銀河西注洗妖氛墜地機槍夜半聞蜀道飛艘勢轉餉朔方驍
騎勇從軍鶴鵝陳合屯江霧蛇虎旗開掃棧雲聞道 賜糧歡
萬姓彤弓先已 錫殊勳

百二秦關古戰場如毛羣盜敢披猖寶雞刷羽聲先震銅馬驚
心骨欲僵諸將果能遵 廟算三軍漸喜卸戎裝願消兵氣蘇
民氣早買耕牛學種桑

頻年瘡海樹戈鋌吹角鳴鉦潑霧邊風裏刀腥龍戶竄潮頭煙
黑虎門懸已看徵側爲窮寇誰道孫恩作水仙滾滾驚濤休恃
險將軍天上下樓船

辛苦人來蛟鱷叢江村守望百家同鼓鼙聲亂春潮裏刀戟光
分夜火中所患是兵還似盜但求無罪忍論功羣黎頌禱渠魁
怖鬚鬢蕭蕭老總戎

黃總戎標

溫沫蛟涎浪作堆沙蟲猿鶴費驚猜繫帆賊已乘風去犀甲軍
如捉月來小醜無知終惜命重臣有守亦需才陽和本是蒼穹
意一破頑陰要震雷

揚雄賦就漫吹噓廿載侯門跡本疎祇合短衣看射虎豈宜長
缺歎無魚中宵偶讀班超傳上畧誰陳黃石書畢竟少游言可
念且騎款段守鄉閭

有感

關外雨如塵憑闌獨愴神祇應雙燕子猶記折花人

詠史

有序 百一首錄二十五首

樂府音律久已失傳雖用樂府體格而不名樂府但曰詠史者從其實也

許由瓢

大莫大兮九州小莫小兮一瓢堯以天下讓之由由不肯受歸諸堯堯能安九州由能安一瓢一瓢在樹風蕭蕭許由之節青天高

夏中興

唐虞傳賢夏傳子傳孫已見兵戈起太康弗反羿距河仲康猶能討羲和帝相忽遭寒浞變夏統之危僅如綫靡奔有鬲后有仍夏統中絕還中興吁嗟乎人心淳古推三代大禹三傳傷禍

敗何況後來世風壞並育安能不相害龍戰虎爭何足怪

兩至德

孝子忠臣有難易易可言德不言至泰伯文王皆處難論定宣尼有深意舜之至德天下知不待聖人爲表微太王愛孫心所注視於無形泰伯去當時反有不孝名稱之曰讓德乃明文王蒙難囚羑里暴主方欲致之死三分有二服事殷一心不二臣節純於戲至聖表揚兩至德孝子忠臣皆極則

曲沃肉

曲沃肉宮中毒小臣斃妖姬哭妖姬狐媚何足誅但恐君老無歡娛君安何惜捐我軀我思太子孝人謂申生愚吁嗟乎惟其至孝斯如愚

絲上田

一龍升雲五蛇喜四蛇得雨一蛇死絲上有田空復爾貪天之功何足云身將隱矣焉用文吁嗟乎母偕隱兮焉可焚

傾國謠

邯鄲姬美婦人歸不韋先有身後入宮爲秦夫人誰知暗中滅秦祀秦國之王呂氏子李園妹美婦人歸春申先有身後入宮爲楚夫人誰知暗中滅楚祀楚國之王黃氏子吁嗟乎傾國傾城有如此滅楚滅秦一女子

亡祖龍

六王畢秦皇雄豈知天欲亡祖龍東巡不返沙邱終扶蘇不從胡亥從始皇生子十有八趙高一手能盡殺蒙恬掌兵六十萬

趙高一紙恬被難吁嗟乎小人害國不在多秦皇雖雄奈趙何
子多將強兵又衆一個趙高能斷送

悲人挽

虞美人戚美人兩般顏色俱青春漢王好色爲天子項王好色
垓下死虞也歌戚也歌重瞳隆準俱山阿世間狠心莫如雉忍
使美人作人篋不及虞兮死馬前至死猶得君王憐

陸大中

老夫佗據南服生一言去黃屋漢天子輕書生生一言新語成
丞相平患諸呂生一言安少主告五男無恩公美飲食以壽終
陸大中誰與俾後方朔前畱侯

五丈原

草廬抱膝梁父吟出師兩表明臣心一言早定三分策魚水君
臣古難得五丈原頭風颼颼六十四陣蛇鳥愁赤芒大星西向
投鞠躬盡瘁死乃已天下奇才止於此司馬懿謂武侯北地葛
侯同一死先帝有孫臣有子

峴山碑

羊公身既逝觀碑淚爲傾杜公生立碑豫爲身後名峴山之碑
在何許羊杜之名自千古後人紛紛爭立碑大書深刻多浮辭
村童敲火牛礪角有碑無碑皆寂寞

桃花源

琴無絃樽有酒當時佛教方盛行公獨心平魯中叟遠公蓮社
衆所推邀公入社公攢眉劉寄奴有異志公不仕劉思避世丹

心自撰桃源記不知有漢語有意公是義皇人不聞宋代事公
往桃花源不住劉家地五柳先生無姓氏晉室忠臣又高士

二紅篇

眼中一虎兼一龍紅拂邂逅知英雄枕邊金合何人見誰其取
之有紅線李郎是虎張兄龍惜哉真龍不屬公金合人頭同一
處頭幸不隨金合去大龍欲飛海龍且蟠金合送至息兵交歡
於戲二紅千古奇女子我爲合傳詩亦史

獨孤誤

六國滅縱橫息扶蘇殺胡亥立六代畢南北一睨地伐出阿廢
入獨孤誤我悔莫及秦隋之亡若一轍

唐宮鼠

才人爾何人云是武氏女識言女武不難知宮中有人身姓武
當時殺之如殺鼠嗚呼李淳風知天不知人縱鼠不殺鼠變虎
食唐孫子殃唐民男子作君文太熟造物有心爲變局武女當
陽壽而福

希夷睡

謂之隱生平兩度升金鑾謂之仕但作處士非爲官謂之儒不
談心性不著書謂之道不言修鍊飛昇好傳言假令白日飛昇亦復何益於世唐
後宋前多少事不礙先生一場睡華山山前風日清先生睡醒
知太平閒來讀易寫作圖偶弄筆墨聊自娛後儒得之若異寶
先天後天纏不了

岳王歌

岳家軍岳家幟痛飲黃龍真快事太子去書生來叩馬一言吁
可哀功臣在外權臣忘燕雲唾手談何易勲名不滅郭汾陽冤
憤竟同檀道濟吁嗟乎十二金牌兩宮棄三字獄成萬人淚墓
上南枝有生氣墓下死人鐵長跪

文山歌

厓門風吼波如山趙家塊肉天水寒五坡嶺頭鼓聲起正氣填
胸餓不死餓不死生入燕不願作宰相願隨故主歸黃泉從容
就義古亦罕一樓三載詩百篇元君元相不欲殺欲殺乃有雷
夢炎嗚呼丹心赫赫兮照汗青義士負骨兮面如生母魂歸兮
自嶺表兒魄返兮從燕京千里萬里兮忽合并一日同至兮吉
州城皇穹降鑒兮忠孝之靈下爲川嶽兮上爲日星

汴州謠

城門開金兵來六甲神兵安在哉
青城北望飛黃埃冰天雪窖去不回
宋人慟哭金人哈金人勿哈宋人莫
衰晚霞世界同灰君不見黃河水急聲
喧壓前渡幹離不後渡速不台城門開
元兵來

冬青樹

世間情事那有此生妖人欺死天子
楊璉真伽發宋陵夜半山頭哭聲起
義士來君莫哀拾得諸帝之遺骸元兵
來士不懼兩士姓名千古著欲識宋陵
在何處蘭亭山上冬青樹

犂眉公

僞王陳漁家子僞王張鹽販子朱家巷
頭火光起真王早屬朱

公子石人眼動羣狐爭一桶打破一桶成小明龍鳳牧豎耳王
氣當在濠州城議奔議降皆可斬奇謀足壯諸軍膽先生躍起
帝更舟巨礮飛來焚戰艦中山開平多戰功功臣配享廟位崇
第一當讓犁眉公惜哉不能從赤松

覓魚賺

鹽帳龍蟠赤光起中有真龍寒不死琵琶聲裏送龍歸者者那
顏好男子龍歸飛躍登九重奪門大賞復辟功文臣武功伯武
臣忠國公嗚呼覓得魚賺宗社福再造功成東市戮陰靈翳天
鬼夜哭三字獄殺武穆二字獄殺忠肅

新建伯

抗封章謫龍場平宸濠武功揚撫南贛三泐定征思田八寨靖

莫疑仙莫疑禪功成且入九華去綸巾野服何蕭然坐讀書起滅賊君王亦知學道人學道誰如新建伯

委鬼謠

唱茄花歌委鬼天下生祠奉闕寺世間怪事那有此文五虎武五彪兒孫十狗爭噪噪東林君子一網盡五人血射吳雲高君不見鉤黨興漢祚覆黨碑成宋運促桃花紅瑤草綠逆案翻明社屋

史閣部

山寺讀書一窮士誰其識者左忠毅揚州城破公死之誰其見

者史德威

乙酉

王師破揚州或傳閣部突圍出城後以史德威日見而後信之見鮎埼外編

小朝廷被

羣奸誤四鎮蟲沙不相顧一手安能扶國步梅花嶺前拜公墓

嗚呼宋明之亡並南渡異代忠魂儻相遇前身文文山後身史閣部

將進酒

將進酒君勿辭金烏東玉兔西蛾眉轉瞬成雞皮妃呼豨兮君知之

俠客行

貴人赫赫權如山門前鷹犬十百一日不得閒解一高堂華屋大

酒肥肉粉白黛綠哀絲豪竹貴人不足解二貴人不足鷹犬僕僕

天陰鬼哭解三鬼哭聲啾啾怪樹啼鵓鷗客從何方來下馬直上

酒家樓解四寒風如刀雪如水酒家樓頭劍光起明日喧傳貴人

死解五

漁翁引

江花紅江水綠手持一竿萬事足魚可烹酒可漉萬事不知睡
方熟思古人兮心悠悠或釣璜兮或披裘一老不肯藏出爲帝
師曰鷹揚一老頗近狂足加帝腹驚星芒我謂不如煙波老釣
徒綠蓑青笠兮來往水鄉釣僮沽白酒樵青炊黃粱終吾身兮
徜徉長與世兮相忘

南海門人李長榮編校
南豐門人趙惟濂校刊

松心詩錄卷二

番禺 張維屏 子樹

長亭

嘉慶丁卯

春水蕩朝霞春城處處花花香吹不散飛入莫愁家小閣芙蓉障長亭玳瑁車傷離休望遠芳草遍天涯

滕王閣

高閣俯長川斜陽此泊船水天終古在詞賦幾人傳都督亦識者江風原偶然我來成獨立鄉思落霞邊

舟中望廬山作歌

我從廬山來衣裳尚有廬山之雲烟潯陽郭外波連天挂席卻登江上船江上船開乍回首廬阜崢嶸出南斗九派茫茫不可

迴五老雲中似招手何時天河水飛下廬山頭白虹倒挂三百丈跳珠濺玉千載無時休紫霄峯上科斗字云是夏禹治水泊船之所留我思匡君兄弟七人結廬曰據此山勝其樂真足輕王侯秦皇漢武求仙不到此卻從何處尋丹邱陶公苦乏濟勝具太白丹崖翠壑夙願終難酬香山草堂雖云樂青衫忽爲琵琶愁古人如水流青山向空立層嵐吹盡江天高捧出芙蓉千朶溼我行廬山陰遠望廬山陽香爐雙劍遞隱現金樓銀闕排空蒼或爲仙人或鬼物或爲獅象蹲伏又或鸞起同鸞皇最高之峯有如老人中立色不動兒孫羅列拱揖奔走於其旁我從廬山來又別廬山去昨夢山靈邀我乘鐵船導我飲甘露笑我乃似彭蠡湖邊之飛雁大風起兮不能住三石梁九屏風列真

苑囿安能窮但覺空際青濛濛他時興發遠相訪定踏赤鯨騎
白龍雲中寄語五老峯爲我先鐫長句丹崖東

潛山客舍訪二喬故居弗得悵然題壁而去

周郎遺蹟歎凋零杯酒誰澆墓草青萬點落紅春又老東風何
處秀英亭

江南

垂柳萬條烟烟條盡可憐佳人出纖手春色畫樓邊三月江南
路東風客裏天無端惹歸思飛絮共纏綿

秋日陳恭甫師招同王伯申宮席引之程春廬兵部同文

陳石士編修川光吳蘭雪國博嵩梁查梅史孝廉揆集寓

齋小飲席上賦呈

吾師儒林宗遠接鄭孔武珥筆有餘閒盍簪集儔侶賤子居京
華秋心墮烟渚昨者得鄉書小醜尙蟻聚亟望常事賢先剿而
後撫樓船掃鯨鯢紀律肅貔虎下以安黎元上以報

聖主羣公雅頌材凱歌協樂府桑梓憂未忘芻蕘策誰取空腸
得酒鳴奇鬱快一吐

奉酬覃谿先生見贈卽次元韻

海上成連去移情未可期但愁操縵拙敢謂賞音遲

公視學粵東後四十

年而屏始入都

萬卷圍身處三更抱膝時蟲吟兼鳥語本意豈求知

予臨陽冰惠山聽松篆以贈南山篆後有云松石相望於
十步外不知幾何時合而相從此語若爲之緣者因賦此

詩卽題南山詩卷內

大興

翁方綱

覃谿

松石本無意苔岑成夙期
竟憑真氣合不恨淡交遲
萬谷笙鐘起千峯雨雪時
琅然鸞鶴語卷外許誰知

都門秋思

四首錄一

天半清霜壓怒鵬
嵯峨樓觀倚丹霄
白河鴈去傳秋信
紫禁人歸賦早朝
夢裏蓬蒿蝸舍遠
眼中塵土馬蹄驕
思鄉懷古愁如海
轉覺名心似落潮

十二月十九日坡公生日翁覃谿先生招同法時帆宮庶

洪式善

宋芷灣

洪介亭

占幹

顧南雅

純

三編修吳蘭雪

國博

高梁

集蘇齋拜笠屐畫像

四海知公雙鬢皤
年年置酒壽東坡
高齋裏展烏雲帖

出觀天際烏雲

帖畢

下里難酬白雪歌
淘盡英雄江水急
敲殘春夢寺鐘多
鬚

眉筮展長如在玉宇瓊樓近若何

贈蘭雪國博

一卷香蘇冰雪詩藏園筆已讓君持金門索米功名薄酒市論
交邂逅奇花月歡場胸有淚江湖浪迹鬢成絲冷官莫笑腰難
折憶向梅花拜倒時蘭雪有滿身風雪拜梅花之句

送南山孝廉出都卽次見贈原韻

東鄉吳嵩梁蘭雪

放膽文章刻意詩窮愁性命共支持千秋把臂交原篤一第
登天事亦奇少日才名憎似錦連宵別夢亂於絲凌雲氣在
終須吐莫忘青衫掩淚時

戊辰四月出都金藝圃駕部

善義漆東樵孝廉璘潘伯臨

比部

正亭

劉三山孝廉

華東

有詩送行留別二首

錄一

鳳城楊柳故依依似向風前絆客衣春夢一場雲共散鄉心千里鳥同飛醉中已覺車輪轉別後休教尺素稀觸熱長途非得已高堂書到有常歸

同人汎舟山塘遂遊虎邱歸途遇韓夢香秀才

繁絃急管催青春蘭舟桂櫂邀美人美人勸我碧螺盞迴腸得酒如車輪披衣登岸山風送生公去後幽禽哢石裂苔留虎氣腥池荒水抱魚腸凍豪華事過轉蒼涼老佛無言塔影長真孃歌舞吳王劍一樣徘徊問夕陽櫻桃香裏簫聲度故人訪我中途遇商量痛飲何處宜要離塚畔梁鴻墓

曉望太湖

瑤雲倒瀉玻璃天白鷺飛破包山煙誰能直跨洞庭脊喚起老

龍耕玉田濛濛三萬六千頃紅鏡徘徊素波冷翩然七十二芙蓉齊整鵷鬢照嬌影我家遠在南海頭臨風洗眼銷躊躇靈威丈人拍手笑笑我廢書成浪遊吁嗟乎人生當學鴟夷子報國功成樂忘死五湖浩蕩一扁舟載得美人泛煙水不然大呼道人攜笛來鐵虬一吼青冥開便騎赤鯉踢波去御風遊戲金銀臺

泛舟西湖

天光碧若湖湖光清似天衣裳忽異色我坐萬綠邊旣罷樹下酌遂登湖上船船頭見我影酒醒涼娟娟柳深百蜩唱荷淨雙鷺拳鱗枝撥水柔聲響隨風圓高峯吐白雲縷縷如輕綿卻瞻黃妃塔界破南屏煙

湖中望孤山遇雨

雲容滂諸嶺雨氣瀾一湖迴風忽吹開窈窕孤山孤裊裊緬逋
仙老鶴如可呼日斜樓觀明水際金碧鋪峯頭飛雨來眾籟交
笙竽灑然萬斛珠散人白玉壺開襟吸湖淥倦客筋骸蘇安得
招米顛潑墨爲作圖

謁文獻公祠二十四韻

嶺海人文關開元相業隆安危一言繫風度幾人同學道侔伊
呂論功邁璟崇詞華冠儕輩謬耿孤忠鑑古千秋重山巍七
寶雄立朝誠侃侃憂國早忡忡仗馬鳴方禁冰山倚未終先幾
知石勒內難弭江充渤海猶頒詔深宮遽伏戎胡雛羞襁褓吉
綢酷繇罌狼子心原野楊花勢實証霓裳按宮徵金鼓震峭潼

目極荆州外魂驚蜀道中孤臣悲馬鬣萬乘歷蠶叢太息忠言
棄空傳祭典豐祠堂屹桑梓風雅振鴻濛後起嗟誰嗣先型溯
不窮笏囊徵故事羽扇緬深衷桂水鳴丹壑梅關諱碧空斬巖
通鳥道開鑿重神功異代宗支遠前賢譜系通祥光芝翬絕遺
址石玲瓏皎皎天中月冥冥海上鴻高吟曲江句松檜起長風
清遠峽

入峽纔發船看山先洗目嶄巖斧痕潤窈窕螺黛感奔如注坡
馬竦若摩空鷗雖輪三峽壯不減九溪曲嶺外少冰霜巖冬秀
羣木草根攢深青石骨裹寒綠寺高遊客稀古飛來寺在山頂徑古老
樵熟我來隔三載風景異寒燠帝子去已遠佳人渺難囑山靈
如有情一路送琴筑

舟夜聞雨

萬馬走江聲孤篷欲二更
澆腸無濁酒照影有寒檠
少壯功名念鄉閭骨肉情
一般似春草都向雨中生

過睢陽廟舟中讀昌黎張中丞傳後序有作

古廟忠魂照水濱寒鴉枯木欲回春
江淮保障憑孤掌郭李勲
名屬後塵揮涕三軍心激烈填胸萬卷血
嶙峋韓公健筆真如鐵
寫出鬚髯七尺身

嚴陵釣臺

有序

子陵先生高風峻節輝山曜
天太白昭昭之歌文正蒼
蒼之歎前賢尙論實獲我心
後人持議輒喜新闢或譏
不仕或疑披裘子竊以爲過焉
山迎水送扁舟再來緬

然興懷率爾成詠非謂增未壤於高山聊欲激頽波於
重淵云爾

桐江水流滔滔釣臺壁立江天高灑然清氣被六合後人買
菜徒曉曉文叔從來稱大度娶妻早有姬姜慕當時物色君念
臣他日椒房新間故先生蕭然垂一竿身世俯仰雲水寬釣璜
豈慕周尙父遯野足配商甘盤畫眉聲急江風起坐擁羊裘山
色裏不從吳市學神仙肯向雲臺博青紫故人狂態左右瞋太
史入奏非無因若云一卧犯帝座後宮玉體多橫陳紛紛鄙夫
戀榮祿炙手權門頸先縮多少男兒七尺身不及先生一雙足
千秋帝友非偶然一代氣節能關先君不見將星熊熊或墮地
客星終古寒芒懸

錢塘懷古

之折江流帶具區潮通龜赭有歸墟如何東下錢塘水不入南
條禹貢書柳岸冰消春欲動荷山泥積澤防淤憑誰健筆追枚
叔一賦秋清鬱抱舒

妖鳥羅平自絕蹤鳳山王氣已潛鍾時來木石皆衣錦運盛江
潮亦避鋒陌上花招新蛺蝶峯頭雲立古芙蓉虎符龍節知何
處一杵飛來水寺鐘

表忠片石尚嵯峨天水偏安奈若何江上龍飛新殿宇夢中人
索舊山河三千鐵弩精靈避十二金牌涕淚多成敗茫茫誰料
得海門南望有驚波

泥馬歸來脫楚囚西泠山水足忘憂塞驢背上英雄老蟋蟀聲

中勅勒秋鍋可銷金輕社稷券曾鑄鐵賜諸侯通仙一去梅花
冷看到冬青鶴亦愁

湖上四首

偶來湖上宿佛燈伴清絕宿淨慈寺曉聞南屏鐘復與老僧別回頭
何所有但見林表雪

峯從何處來飛入招提境小憩冷泉亭泉聲隔煙靜石氣生暮
寒微風動山影

入寺尋溪光修徑繚而曲幽禽時一鳴上有萬竿竹空山闕古
春諸天在寒綠

昨日遊雨湖幽興殊未歇今晨雨復止晴湖覽空濶還留未了
緣相約泛秋月

姑蘇懷古

姑蘇臺畔草芊芊過客山塘又泊船
虎氣一丘橫夕照魚腸千劍化寒烟
人傳角里爲商皓我道鴟夷是水仙
問訊滄浪亭在否清風明月不論錢

短簿祠邊立曉風三品雲外望晴虹
朱欄樓閣參差出綠水溪橋宛轉通
穿塚死當親烈士吹簫窮易困英雄
五人墓上誰澆酒花片飛來似血紅

干莫雙棲劇苦辛鑄成神物動星辰
試思斷髮投爐日何似齊眉舉案人
傾國採香真採恨荒墳埋玉不埋因
瀟瀟暮雨吳娘曲旅客聽來倍愴神

破楚門空霸業消春山猶作翠眉嬌
生公法滅留頑石伍相魂

飛徙怒潮歌扇舞衫千日酒風廊水榭百枝簫扁舟載得吳宮
月直到揚州廿四橋

辛未下第出都留別汪益齋庶常

銘謙

紫陌春遲未見花轉蓬身又出京華此行一事君輸我瓜果筵
開可到家

黃河

客來自燕將渡河未渡適觀河上翁翁言家住黃河側談河口
與懸河同源高開自星宿出氣盛欲與江潮通天使太行折而
北龍門底柱當其衝有如銜勒控驕馬又若節制縻英雄大哉
禹力疏作九稍殺厥勢分其鋒齊桓時已非故道八支亡失迷
所從可知泥多易淤澱水流泥在河身崇賈讓賈魯策稱善今

昔異勢難爲功河性慄急屢變易自古由北趨於東七百年來
轉南徙黃淮濟運功何窮治河言殊孰可法河防一覽推潘公
前明潘季馴著築隄束水使水合水合力猛將沙攻新沙不停
舊沙刷水得就下無橫漚我

朝靳輔屢奏續用陳潢

潢字天一錢塘人

言其聰聰籌河十疏次第上

大意亦惟潘是宗乃今

聖皇御六合百神効職皆寅恭河流順軌河伯靖宵旰尙復勞
宸衷車衡屢發不惜費隄防堵垣時鳩工安瀾奚用問沈馬中
澤不復嗟聲鴻浮槎上可達銀漢客倘有意追前蹤客聞欲答
翁別去河干滾滾塵隨風

淮陰釣臺

已藏烏盡不堪論雲夢歸來伏禍根一命終懸蕭相手三分曾
拒蒯生言功臣權重原非福國士途窮易感恩千載釣臺臺下
水至今嗚咽爲王孫

番禺門人沈世良編校

南豐門人趙惟濂校刊

松心詩錄卷三

番禺 張維屏 子樹

太平酒樓歌

并序

羊城西南有月城其門曰太平門內數武有樓翼然高
及女牆之肩樓窗洞開萬戶一覽清風肅客白雲布筵
雖釀花非餘杭之仙當壚少卓氏之女然而老羌方渴
麴生爲緣飲多鄭公之壺眠有吏部之甕莫不青蚨雨
集綠蟻川流飛大戶之觥籌話中年之哀樂杜陵有債
尙可典衣賀監乘船不愁落井螯持手熟鯨吸腸寬顏
酡侔葩歌響裂竹嗟乎君子有酒能消萬古之愁仙人
好樓何妨一石亦醉旣醉有詩書代酒券見者曰書生

耶酒徒耶頑仙耶酒保曰嘻吾烏乎知之

交衢突兀糟邱臺樓窗三面玲瓏開尋常有酒且一醉何況相

逢舊雨傾新醅

遇劉三山周秀圃

卅年歲月堂堂去手挽羲娥不曾住

小時明月鏡團團照我朱顏已非故女牆嵒嶮臨西城太平臘

鼓蓼蓼鳴千人萬人樓下行是時雨霽天空青青天蕩蕩雲亭

亭雲來雲來勸爾一杯酒問爾天上何所營胡不干巖萬壑藏

爾形胡爲東西南北朝朝暮暮也似勞人行不停白雲不暇與

我飲遠送落日金盆傾紫霞忽起橫庚庚飄飄衣帶當風輕樓

頭吟嘯不自覺散作半空鸞鶴聲吁嗟乎北邙巖巖多宿草山

陽笛又傷懷抱

年來故交多化爲異物

空裏優曇一刹那海底珊瑚幾枯

槁苜蓿難令駿骨肥丹砂不救蛾眉老西子終輸嫫母貴東方

且讓侏儒龜螺贏螟蛉亦自豪雞蟲蠻觸何時了佞佛誰能淨
六根學道先須除九惱明朝有約謁安期試問何人得瓜棗

九月廿一夜墨卿太守枉過談至二鼓

仙城夜靜局魚鑰秋氣蕭森動寒穽徹廬時有素心人步履叩

門來不約路人猶識舊使君坐客

黃香石同年
朱越亭上舍

願聞新著作笠

屐重披嶺嶠雲敦槃尚憶揚州郭郵筒曾寄尺素書邀賦梅花

款東閣水部風流公克嗣仲蔚蓬蒿我如昨未能沈默類木雞

詎敢昂藏慕軒鶴久別相逢看鬢鬚佳節登高健腰脚聞公近

嗜先賢書灑掃靈臺事濂洛才華收斂返篤實此意洵足藥浮

薄千紅萬紫雖悅目不樹五穀何以獲世途自昔歎險巇道味

由來耐咀嚙素交但勗崇令德不朽何嘗藉高爵柴門相送霜

月斜兀坐空堂數臂杓

贈南山孝廉卽題松石讀書圖用昌黎山石韻

汀州 伊秉綬 墨卿

倚松奇石晨光微老蛟鬱律秋雲飛科頭把卷者誰子吟詩
不瘦味道肥西銘有砭吾黨重南園以降斯人稀斑斕威鳳
勒遠覽婉孌季女愁朝饑九年突來千里客便借月色開柴
扉素心適逢銀燭翦清言都比玉屑霏載尋松石了無見但
有萬卷將身圍乃知曠懷特高寄萊絲昨浣京塵衣吾生愈
深金石癖於世慙脫名利轡松貞石介良可法試問遠客何
如歸

賓谷先生見梅花有詩見懷次韻奉答

昨夢與孤鶴入山等白雲曉來見南雪春信報東君茅屋澹相
賞妙香空裏聞題襟襟上月容易感離羣

見梅花簡南山孝廉

南星 曾 煥 賓 谷

浮出溪邊月

白雲山
有月溪

吹來嶺上雲山深宜處士花發爲夫君

醉向雪中卧香從人外聞此時蒲澗寺惟與鶴爲羣

上元後三日劉樸石編修

彬華

招同謝豐浦庶常

蘭生

呂

子羽上舍

翔

漆龍淵

塘

高西山

士釗

兩孝廉葉雲谷農部

夢龍

載酒花埭飲於翠林園席上醉歌

珠江碧水搖菰蒲花光倒影浮珊瑚一船移泊眾香國花氣醉
客如醍醐主人種花識花意萬花深處留餘地小橋一道背嬌
紅高閣三間面疎翠迴廊曲榭臨方塘酒人列坐花中央千紅

萬紫在堂下堂上侍酒惟花王

牡丹初放

手持一杯與花語春光澹

岩無風雨客來酒滿花是賓客去園空花作主羣芳且莫驕青
春多少拾翠停橈人欄畔驚鴻波底影風前飛燕掌中身酒後
看花三里霧惜花客欲陪花住張顛沉醉問劉郎欲訪天台向
何處我不願封萬戶侯亦不願識韓荊州但願春醪多似水年
年花發客同遊

九日粵秀山登高

同集者顧錫罕胡香海周伯恬李紹伯江石生周南卿王香谷主人方伯曾公

夜聞花塔風鈴語明日天當不風雨曉來萬里無纖雲倒挽澄
江洗天宇我我南城公有似古歐陽山水之間得真樂春秋佳
日可以對客傾壺觴我時抱病伏閭里公來招我翠微裏坐我
越岡之側楚庭之巔吹我以五仙觀上之靈風滌我以鮑姑井

中之甘泉酌我以鵝黃鴨綠之美酒示我以瑤繩金檢之奇篇
使我沉憂得釋煩痼得蠲左把稚川袖右拍安期肩飛觥脫帽
銀海眩斗覺南溟雲氣浮樽前五羊城中十萬戶下視漠漠蒼
蒼然有人山下一矯首望見酒龍詩虎皆神仙不知今日海內
名山百千億幾人高會羅羣賢朝臺安在哉歌舞亦消歇王宏
頗解事長房莫饒舌茱萸之囊繫臂求長生何似菊花之酒長
不竭百壺欲盡醉兀兀風馬雲車去飄忽山頭客散山不孤一
片飛來漢時月

喜康侯至約遊白雲並簡月亭香石蒼厓紉秋熾庭諸君
望書眼欲穿誦詩鼻屢嚏衡門百剝啄不意君一至才人有道
根溫柔變剛銳草心猛斯拔葵足堅自衛空欲坐四大寂若持

半偈養符木雞德健蓄冥鴻毳乃於六月息忽類九月遘紆軫
停霄雲揚舠犯江颶乍維子猷舟爭挹浮邱袂賤子遭艱虞比
歲益化僚舊雨千里來一笑破雪涕披胸理積緒眴目出奇製
風霆戰蒼檜月露洗紅桂虎騰始哮怒龍縮轉道細君誠詩中
豪二豎敢牽掣昨者爲我言精力恐難繼盛年見衰態有若晝
方壇聞君自鍼砭覺我多翫惕開卷古人在閉戶白日逝苦心
春蠶絲虛名夏蜩蛻嗟余憂未蠲願君志毋替驂雲控虬螭耕
煙樹蘭蕙于野有同人香石綴秋新
關雲泉山館奮起關樞翳頓令巖壑新
不受荆棘蔽層樓枕山腰一亭立雲際幽尋泉自導險語石可
礪君來非偶然山靈似含睇飄飄安期生雲車載容裔翩翩九
皋禽丹臺送清唳茸茸九節蒲采采辟疵癘招招宜盍簪去去

勿留滯凌晨躡飛霞一覽江天霽

答劉孟塗秀才兼寄姚石甫進士

仰屋虞卿拙談兵杜牧狂無言看短劍有淚夢高堂跌宕詩千
首艱難粟一囊煙中片帆舉海色忽青蒼

去歲城西酒歡筵是別筵美人千里外春思百花前瓊珮天風
遠客華海日鮮豈宜修竹畔空谷老嬋娟

贈南山孝廉

桐城劉開

展我碧霞箋書君白雪篇孤花豔春色空翠點晴煙此筆自
今古有人來海天相逢無限意留記暮雲邊

痛飲不知醉新交翻易愁行藏看一別邂逅足千秋立志在
霄漢高文齊斗牛遲迴江上路卻是爲君留

贈南山孝廉

桐城

姚

瑩

石甫

煙水蒼茫越尉城春風啼鳥正嚶嚶求人我信同饑渴相士
君堪託死生文到漢秦方論氣詩如李杜未忘名他時短榻
青燈裏乞與匏樽仔細評

覃谿先生有詩見懷次韻奉報

萬頃茫然問去津探源星宿渺難論水常入海千條合詩可呈
天一字真便到古賢須有我獨開生面肯依人卓錫立壁貧非
病但乞奇方療腹貧

墨卿書來云先生春來日與蓮裳南山論詩可羨也是日
適得南山手書而蓮裳將歸矣賦此卻寄 翁方綱

千里金張叩笈津

手山南山皆有札
商山蘇入杜之義

一源蘇杜孰推論杜惟

質厚元無訣蘇取雄奇恐不真故紙何關拈笑處焚香要共
會心人樂吳隔甚精微訊昨與蓮裳閣下論詩未盡所懷但草雖來未是貧

厓山宋三大忠祠

太興雖東江可渡紹興雖南湖可住吁嗟一后提兩孤航海更
無容足處堂堂宋室三大忠死有先後同鞠躬兩河百姓等灰
燼所不滅者惟臣衷慈元殿上垂簾日執笏講官猶壁立搜天
龍黑失滄溟墮地星紅飛霹靂厓門際海環驚濤行宮三十安
能半狀元宰相復何事夢炎屈膝宜中逃海陵山旁海舟覆忠
魂毅魄相追逐翻惜三閭徒自沈未得隨君入魚腹一餓八日
生入燕從容柴市原關天文山未死宋猶在獨身尙可支三年
君不見厓石嶄巖元代字荒苔埋沒誰曾記海潮嗚咽精靈來

似有人提竹如意

餐菊二十韻

老圃人有年菊開如穀熟名殊百種繁色眩千朵簇亭亭霜滿
枝采采雪盈掬帶宜快翦去質愛清水沐堆盤白紛紛下箸香
馥馥人懷疑鏤冰到口訝罪玉增鮮剝蝦蟇助爽膾莖微寒
清熱腸大嚼果枵腹高人合吞花瘦客厭食肉冷同槐葉淘潔
勝桃花粥奇功儻延年小效亦明日此藥乃適口此味可醫俗
食單三閭開真意五柳足濁醪潑新黃濕麪裹焦綠麪包菊葉煎食之
含咀得其芳饗未爲辱微甘留齒牙餘芬及僮僕讀書宜楚
辭卜宅慕鄴谷帝觴展重九唱和繼皮陸賓客喜餐英主人善
耘菊

雲谷一年年爲此會金丹不須服

水仙四首

江上花風第幾番，凌波纔見已銷魂。
鏡中覓去雲無影，簾底窺來月有痕。
早卸單衫拋杏子，怕隨雙槳伴桃根。
陳王一賦情如海，試翦銀燈與細論。

塵寰小謫奈愁何，回首羣仙隔大羅。
昔昔鹽猶歌夜月，空空手欲挽秋波。
吳頭楚尾家無定，暮雨朝雲夢易訛。
輸與枯槎能解脫，飄飄流得到銀河。

成連一去賞音孤，大海琴聲半有無。
未履波濤朝白帝，愛修冠帔禮黃姑。
幽芳肯讓梅兄占，小醉偏宜石友扶。
秋菊寒泉風味好，此生端合傍西湖。

娟娟瘦影俯清流，眼底穠春轉素秋。
狂士形骸多放浪，美人心

性本溫柔癡情尙擬尋雙佩故事空勞記十洲只恐香魂留不住
要騎紅鯉踏波遊

春遊同謝澧浦太史作

芳郊隨處惜春非緩步歸遲月上扉但使筋骸堪馬磨未須風
雨歎牛衣坐逢佳士清樽滿畫到名山彩筆飛前日之遊君爲作圖不羨
簪纓羨蘿薜近來幽興似君稀

同南山孝廉春遊有詩見示次韻奉答

南海謝蘭生澧浦

冶春天氣靄菲菲到處名園許款扉大海釀波成美醞暖雲
裁錦肯生衣無情亦恐神仙老有興能教筆舌飛閒柳尋花
吟不倦如君才調見應稀

遊羅浮由九天觀至華首臺

入山出九天人面忽然碧渾忘春陽暄陡覺古雪積林霏結空
綠天影漏微白龍嵒風衝松偃仄瀑擊石一橋飛雨花妙香澹
無迹幽篁鳴玉琴老蘚展瑤席左股分蓬萊何年返其宅

重遊羅浮

香山黃培芳香石

四百三十君一見先歡然問我來何暮揮手開雲烟行行入
深處猿鶴導我前此來務緬幽無失背與清泉石如有待一
一爲銘鐫

黃仙觀

手持一瓣雲去謁黃野人野人渺何許笑語空中聞似云舊相
識小別三百春丹邱有故宅曷爲戀紅塵我仙非餌丹紀載多

木八言金卷三
失真山頂有玉池泉味如酒醇一酌消百憂再酌忘其身逡巡
四五酌飄飄躡天根天根亦非遠醉後時可捫子來勿憚勞蝶
翅如車輪

出茶山洞望小蓬萊諸峯

木勢欲無山山勢欲無日層巒巧繡縫眾綠森密栗天公方作
畫雲氣供墨汁長風助揮灑萬象一時濕迴頭電鞭馳到額雨
點疾陽崖飛溜過陰洞遊客出不憂高磴滑但惜奇景失峯多
頸屢延水涼髮如櫛黃昏抵酥醪仙漿飲能必

宿酥醪觀夜登斗臺

仙人亦酒人酒後善遊戲至今酥醪洞風露皆酒氣我來吸空
香未飲意先醉諸天綠漾漾仰見星斗翠月描神女眉竹寫安

期字

制有符竹

定雲野猿縛慧水毒龍制何必乘飈車心出人間世

有酒

非序

三月一日分霞樵客宿于稚川北菴酥醪一杯不覺竟
醉酒醒夜半開戶出視雲氣離合妙香徐來偶爾會心
欣然操翰豈謂性海情塵頓歸般若亦欲青肝蒼腎同
葆谷神

有酒漉漉百年電速渴驥奔泉枯魚上竹神離絳宮鬼瞰華屋
醉飽優倡饑寒戚族前堂高歌後戶低哭鏡花春紅墓草秋綠
誰歟惡業識字憂伏紙靈何功繭蠶自縛索米一囊嘔血一斛
老佛攢眉上仙捧腹與爾靈丹非草非木爾病自醫爾藥自服
病在有求藥在無欲大笑嘖之百骸如沐

浮山第一樓題壁

一酌酥醪骨欲仙樓高覽盡洞中天
心飛海日三神上身在蓬萊
左股邊桂父叩門談服食
麻姑招手話桑田
拍肩又被洪厓笑我墮塵寰六六年

浮山最深處

浮山本浮來雲氣似浮動
雲來羣峯迎雲去一水送沿溪
四五轉萬綠密無縫雲深見
人家宛若桃源洞自言世居此
無事但耕種坐臥水聲中心清
久無夢想其風俗淳懷葛相伯
仲外人機械心到此無所用

遊浮山最深處至暗花溪橫雲谷

黃培芳

雲端千尺松心逐飛鳥
度轉轉四五峯高下屢迴互
窅窅入

幽境石梁橫瀑布桃花開碧溪流鶯喚芳樹因樹架爲門離
披綠葉護世外有佳人求漿頗不忤小兒秀眉目見客玉齒
露門前憩瑤石靜極得真趣杳然非人間已失來時路

羅浮歌

我思看山如相人要畧體貌觀全神我思看山如畫竹節節爲
之苦斷續卽如羅浮四百峯峯面目安能窮我從羅南至浮
北若論大勢粗已得茲山之妙脈絡深自從開闢直至今尚有
勝境無人等茲山之奇魄力厚宛若陰陽相抱負中有大氣母
羣岫南交地宅南海邊海波搖蕩土不堅特使名山作重鎮造
物此意非偶然巨壑壓伏不敢動百粵峯巒皆侍從上公秩遜
秦岱崇專藩職比衡山重金鳥出海光先貢羣仙正在朱明洞

種出梅花似美人騎來蝶翅如丹鳳商量佳處留茅菴山靈莫
笑遊人貪君不見當年老仙抱朴子拋却江南來嶺南

黃龍洞老人

有序

洞蟠山椒蘿磴修曲登未及半瀑聲如雷比躋其巔白
龍蜿蜒乃在鳥下大石數丈瑩淨如玉洞口有迎仙橋
長松桃柳撐霄蔽日老綠肅肅古寒逼人遇一老者具
茗欸客微笑寡言日暮出洞循厓迴眺嵐霧如海人蹤
杳然但聞風濤鏗鏘而已

黃龍洞口逢道人白雪爲髮松爲身生平不肯入城市城市人
來亦歡喜有茶與客解渴煩有琴在壁久不彈道人忘言客歎
息萬壑沈沈起寒色

答惲子居大令敬卽送歸常州

關佛推韓豪談禪讀蘇勝儒釋雖殊途一本在心性陽明講良知白沙亦主靜從來大智慧方寸皆水鏡嗟哉眾生苦一念纏百病但令迷津回孰非寶筏贈君精釋典喜談禪理古山一聲鐘要使萬猿定

嶺猿少歡聲山木多勁枝松心抱石骨於世百不宜眼勉逐時趨寸步生險巇感君砭我頑導我於坦夷孤詣仲容許溫言蔣山規君以古文相勗目余爲嶺外柳仲途瀕行復舉蔣山禪師語相示勸君韜其光霧豹藏陸離歸去潔蘭膳和樂鳴壺簾孝友政在家愛日娛春暉

達人

百年三萬日一日十二時達人有活法分算乃得之譬如昨日

憂今日我弗思譬如來日難今日我弗知君看今日花前日猶
空枝君看昨宵月今夕雲四垂宇宙大傳舍去住無定期人生
貴適意浮榮如電馳曷爲擲心腎易彼毛與皮

戊寅夏日制府阮雪臺先生招同許青士

乃濟

劉樸石

彬

謝澧浦

蘭生

三太史集節署之東齋

北來旌節斗奎明南望滄溟水鏡清武庫新臨杜元凱經師兼

得鄭康成千編煥發圖書府十郡歡騰雅頌聲

席上話及刻
席上話及刻
席上話及刻

東通志

學海百川同至海教思無盡見堂名

公欲建堂以古學
課士名堂曰學海

柳色四首

纔舒青眼已纏綿繒出清明二月天芝蓋春旗如昨日雨絲風
片又今年一堆生翠淨香閣半角新陰歷畫船莫唱渭城三疊

曲銷魂人在滿橋邊

秦關漢苑復隋宮
舞扇歌塵迹已空
霧影迷離天遠近
烟痕狼藉水西東
牽來芳草和雲碧
襯出桃花特地紅
試向短長亭畔望
峭帆如夢笛聲中

濃於桑柘淡於苔
積靄浮嵐幾費蒼
翠幙有紗鶯坐穩
碧城無鎖燕衝開
三邊旌旆征人淚
六代雲山賦客才
似恐春光頻漏洩
深深圍住好樓臺

飛絮飛花一萬枝
白門紅板總相思
夕陽掩映秋千院
殘月蒼涼柳七詞
近水易迷漁子櫂
隔林遙認酒家旗
風前且自開眉黛
莫向離亭管別離

柳波曲

海珠西復西波綠柳條齊花多人眼亂酒醉客心迷良辰佳興
發絲竹聲清越船尾下斜陽船頭上新月新月樣彎彎美人眉
黛間定情金絡索解意玉連環眼中羅眾妙眉語心相照白雪
素馨來紅霞妃子笑妃子笑荔枝名得句問黃姑雙聲悅耳無人如連
理樹地似莫愁湖風前歌一闕酒冷腸偏熱楊柳慣含情年年
送離別畫舫蕩春波花飛人奈何停橈問垂柳別緒是誰多

愁

催殘青鬢送華年來似春潮去似烟一半易消惟酒後十分難
遭到眉前根原自種憑誰拔藥不能攻比病堅天上迢迢如可
寄欲分滋味與神仙

夢

黑甜鄉遠去何之百歲光陰半在斯
悟破邯鄲吾喪我飛來蝴蝶子爲誰
精魂異代能相接苦樂同牀各自知
一笑夢中聊說夢大家都是睡酣時

有畫昭君太真者合題絕句

絕代昭君與太真馬嵬青塚兩酸辛
六軍不發匈奴入事到艱難用美人

送曾公撫黔

昨持八功水洗此炎海塵

長壽寺脩禩

今乘八騶車去作柱石臣彼

都古羅施土宇歸陶鈞前明置巡撫建節綏苗民郡邑邊犵狁

文教猶鬱湮

帝命南斗精遠駕東風輪手擎千扶桑照耀開荆榛八番十八

衛次第數

皇仁瓣香得南豐士氣當益振鯁生處海隅鷺爲比鄰蓬蒿
慕仲蔚桂樹懷卻詵此身雖迤邐此骨猶嶙峋感公愛我厚感
公知我真分忘車笠殊緣喜文字親播筇煙霞窟擊鉢桃李辰
風泉蒲澗夢香火詞林因賞雨攜玉壺屢列修竹賓茲晨櫻筍
筵欲獻羅浮春名酒羅浮久延佇公去山如鑿前旌已飛動別酒
難逡巡白雲有離合牂牁卽通津他時東閣開許我重吐茵

松廬把卷圖歌爲南山孝廉作卽以誌別 曾 煥

珊瑚木難光照市北里歌鐘達南里中有一人獨清寒身如
枯僧坐烟巒不知塵世有何事終日手持一卷看巖泉白飛
硯席上松色青入鬚眉間往時月溪與雲淙湛黃請學於其

中三百年來山絕空無人復肯巢雲松而君灑墨爲玉虹矯

首青天垂九龍

月溪雲淙玉虹洞九龍泉並在白雲山明時

泉山館

旁人笑君飢且凍君乃囂囂白吟諷席毘常有風霜姿

孫綽豈無棟梁用我但知君不能貢漢廷他日中和頌

偶檢故篋見馮魚山先生

敏昌

手書見贈有聲華日下荀

鳴鶴志節琅琊曼容之句期許甚殷賦詩誌感

荀邴俱爲一代賢昔人名句至今傳馮唐已逝留遺墨重感牙
期一泣然

南海門人李長榮編校
南豐門人趙惟濂校刊